

設應

善乃圖難於易爲大於小先用賞後用刑此用兵之妙也師徒已列戎騎交馳強弩纒臨短兵又接乘威布信敵人告降此用兵之能也身衝矢石爭勝相對成敗各分彼傷我死此用兵之下也

便利

夫草木叢集利以遊逸重塞山林利以不意晴明無隱利以勇力隘途深草利以潛伏以少擊眾利以日暮以眾擊寡利以清晨強弩長兵利以捷次踰淵隔水大風暗昧利以搏前擒後也

應機

道藏輯要

忠武侯集  
心書

三

星集三  
川八八

夫必勝之術合變之形在於機也非智者孰能與於此乎見機之道莫大於不意故猛虎失隊童子曳戟而追之蜂蠆入袖壯夫恟惶而失色以其禍出不圖變速非慮也

揣能

古之善用兵者揣其能而料其勝負主孰聖也將孰賢也吏孰能也糧餉孰豐也士卒孰練也軍容孰整也戎馬孰逸也形勢孰險也賓客孰智也鄰國孰懼也財貨孰多也百姓孰安也由此觀之強弱之形可以決矣

輕戰

螫虫之觸負其毒也戰士能勇恃其備也所以鋒銳甲堅則人

輕戰故甲不堅密與肉袒同弩不及遠與短兵同射不能中與無兵同探候不謹與無目同將鬪不勇與無將同

### 地勢

夫地勢者兵之助也不知戰地而求勝者未之有也山林積石邱阜大川此步兵之地平原小坡蔓衍相屬此車騎之地依山附澗高林深谷此弓弩之地草淺土平可前可後此長戟之地蘆葦相參竹樹交映此鎗矛之地

### 情勢

夫將有勇而輕死者有急而心速者有貪而喜利者有仁而不忍者有智而心怯者有智而心緩者是故勇而輕死者可暴也急而心速者可久也貪而喜利者可遺也仁而不忍者可勞也智而心怯者可窘也智而心緩者可襲也

### 擊勢

古之善將者先探敵情然後圖之師老糧絕百姓愁怨人多疾疫計不先設器械不修卒不習練外救不至途遠日暮士卒勞倦將薄吏輕懈不設備進不暇陣陣而未定行阪涉險半隱半出踰津越河旌旗散亂將士相違戰勝而驕行陣失次兵疲而驚大軍雖給而眾未食自行自止或前或卻擊之無疑若上度下惠信賞必罰陳力就列任賢使能師恭而禮甲兵堅利糧備有餘政教不虛四鄰和睦大國應援敵人有此引而辟之

道藏輯要

忠武侯集  
心書

三

屋集三  
X〇〇〇